


本傳

徐經孫字仲立初名子柔豐城人寶慶二年進士授瀏陽主簿潭守俾部牙契錢至州有告者曰朝廷方下令須行十七界會令若此錢皆用會小須則幸而獲大利矣經孫曰此錢取諸保司出諸公庫吾納會而私取其錢外欺其民能欺其心奚可哉詰旦悉以所部錢上之其人驚服有愧色辟永興令知臨武縣通判潭州帥陳韓雅相知事必咨而後行秩滿由豐儲倉提官進權轄國子博士兼資善堂直講為監察御史勅京尹厲文翁言

偽而辨疏入留中宣諭至再即日出關上遣使追之不
及進直寶章閣福建提點刑獄號稱平允歲餘陞安撫
使召為秘書監兼太子諭德經孫為安撫時韓家居門
人故吏有撓法者不得逞相與搖撼至是韓起家判本
郡懷私逞忿無復交承之禮即日劾奏通判削其秩經
孫造朝具白於政府事上聞帝大怒諭宰執曰陳韓老
謬至此宜亟罷之於是經孫再詣政府言某韓門生也
前日之白公事也苟韓以是得罪人謂我何請之不置
俾自乞開明通判無罪識者避之遷宗正少卿起居舍

人起居郎入奏君人者當守理欲之界限遷刑部侍郎
兼給事中陞太子左庶子太子詹事輔導東宮者三年
敷陳經義隨事啓迪太子入侍必以其所講聞悉奏之
帝未嘗不稱善景定三年春雷詔求直言經孫對曰三
數年來言論者以請共為主有懷者以譁訐為戒忠謹
之氣鬱不得行上帝降監假雷以鳴切中時弊時公田
法行經孫條其利害忤丞相賈似道拜翰林學士知制
誥未踰月諷御史舒有開奏免罷歸授湖南安撫使知
潭州不拜授端明殿大學士閒居十年卒贈金紫光祿

大夫經孫所薦陳茂濂為公田官分司嘉興聞經孫去
國曰我不可以負徐公遂以親老謝歸終身不起





文惠詩集

題施山觀音閣

閣道連雲棧，簷牙覆竹陰。
南來天馬渡，北落水龍吟。
林鳥疑譚偈，田花欲布金。
凭欄觀下界，洞見遠公心。

病中有感

習懶多成病，旬餘久覆杯。
悵中聞燕語，瓶裏看花開。
醫已肱三折，愁來腸九迴。
何時得踈散，屐齒印蒼苔。

贈魯司戶

豐城徐經孫仲立

國家圖書館 NATIONAL CENTRAL LIBRARY, TAIWAN, R.O.C.

君家螺江頭我家劍江邊千載會相望飲水同一川竭
來古梅開相識春風前高義軋層漢清談響幽泉努力
効徃哲勿為時俗牽

和黎丞梅閣嶺

峭壁接高天閒雲淡橫嶺稍便僧房靜未覺官曹冷風
月兩閒人山川一佳境誰歎共茲樂老仙白垂領

丙戌年新春偶成

新年十許日才有一篇詩鄉思風中亂春心雨裏知病
緣衰驟至懶與睡相宜暗想泉溪上杜鵑啼故枝

小英石峰

舊作英巖隱今為庾嶠行雖然一拳許有此數峰青峭
崿驚凡目堅劉惔世情墨卿相指似只尺是蓬瀛

送大庾黎丞

客懷秋易惡送客更當秋薄宦相從久孤征肯暫留酒
輕離思重目短大江流黃菊聊持贈寒香晚不羞

月夜赴郡會歸鞭轉不成寐觸事感懷

庾山高入雲章水清見骨山高晚宜梅水清寒浸月美
人天一方雪煙妙空濶帶月簪梅花獨起舞殘雪

覺溪八景 今存其三

雷奔石壁間，瀑瀉洞門側。蜿蜒乘洪濤，變化莫可測。龍

浪春

山園古寺陰，曙陽鯨音發。悠揚三四聲，喚上東林月。福隆

鐘晚

飄瀟鷗鷺群，浙瀝孤蒲晚。雲斷山月明，新泉落前澗。塘驟

雨暮

雜興

梅花亦何奇，偏得出人愛。清寒風雪夜，一枝靜相對。

自贊夏端甫所繪真

老我不堪位置，歸來久酒漁樵。忽然珠玉在側，見之令人意消。

出朝賦歸來好

歸來好，籬下菊花應未老。晚香猶可薦清樽，淵明醉後和衣倒。

歸來好，一入山林跡如掃。杜門謝客免慙尤，几淨窗明讀莊老。

恭賀御製詩

多士新彈禹貢劄對大忠切動龍顏臚傳散徹頒袍笏
燕喜筵開肅佩環樂奏簫韶成廣內詩成奎壁照人間
微臣捧詔慚踈拙祇抱傳宣拜賜還

福州即景

一別居諸歲月增遙聞此景畫難能潮田種稻重收穀
石路逢人半是僧城裏三山千簇寺夜間雙塔百枝燈
常年六月東山裏地薄寒泉漱齒冰

長孫敏學校承務郎

辛勤場屋一書生六卷時文謾策名身事兩朝奚所補

恩覃五世亦何榮前人履澤宜豐報兩輩官曹詎可輕
移孝為忠斯不負更須勤學紹家聲

送仲時弟

江關千里隔山川有弟能來慰眼前方喜雁行隨處樂
可堪蟾影別時圓暑行勿亟宜強飯湍激多驚莫問船
歸到家山相勞苦團樂却是菊花天

乙丑三月十二夜夢得家有園池樂壽康之句
覺而足成効邵康節作首尾吟

家有園池樂壽康閑中日月覺偏長睡餘携杖遊花園

飯後呼童給鶴糧
堆案縱橫書數冊
隨盤歡喜酒盈觴
客來問我渾無事
家有園池樂壽康